

Na osnovu člana 25. tačke 3. Zakona o veterinarstvu u Bosni i Hercegovini ("Službeni glasnik BiH", broj 34/02) i člana 17. Zakona o Savjetu ministara Bosne i Hercegovine ("Službeni glasnik BiH", broj 30/03), Savjet ministara Bosne i Hercegovine, na prijedlog Kancelarije za veterinarstvo Bosne i Hercegovine, na 65. sjednici održanoj 16. septembra 2004. godine, donio je

## **ODLUKU O USLOVIMA I TRAJANJU KARANTINA ZA UVEZENE ŽIVOTINJE**

### **Član 1.**

Ovom odlukom se određuju vrste i dužina trajanja pregleda i ispitivanja te način njihovog izvođenja prilikom uvoza životinja, uslovi kojima moraju udovoljavati i procedura određivanja objekata gdje će se pregledi i ispitivanja izvoditi.

### **Član 2.**

U smislu odredaba ove odluke:

1. karantin je sistem protuepizootijskih mjera u određenom mjestu i za određeno vrijeme radi provjere zdravlja uvezenih životinja;
2. karantinski objekat je prostorija, nastamba ili skup nastambi, kao i otvorene površine oko nastambi u kojima se u uslovima potpune izolacije drže životinje iz uvoza, tako da je spriječen neposredan ili posredan dodir s drugim životinjama dok traje provjera njihovog zdravstvenog stanja;
3. mjere koje se mogu provoditi u karantinu su klinička i imunološka ispitivanja, patoanatomske i laboratorijske pretrage i sve mjere usmjerene na suzbijanje i iskorjenjivanje zaraznih bolesti koje su predviđene zakonom;
4. službeni veterinar u smislu ove odluke je veterinar, zaposlenik Kancelarije za veterinarstvo Bosne i Hercegovine (u daljem tekstu: Kancelarija), nadležnih veterinarskih službi entiteta i Brčko Distrikta Bosne i Hercegovine koji je upisan u Registar Kancelarije;
5. životinje su, sve životinje prema članu 3. tačka 66. Zakona o veterinarstvu u Bosni i Hercegovini, njihovo sjeme, zamci, kao i jaja domaće peradi i drugih ptica.

### **Član 3.**

Karantinski objekat za uvezene konje, magarce, mule, mazge, goveda, ovce, koze, svinje i perad u vezi izgradnj prostora mora udovoljavati slijedećim uslovima:

1. prostor na kojem se nalazi karantinski objekat mora biti udaljen od naselja, stočnih objekata, kafilerija, smetlišta i jama grobnica najmanje 500 m, a nivo podzemnih voda na mjestu izgradnje mora biti najmanje dva metra ispod površine;
2. karantinski objekat mora biti dovoljno prostran da bi se obezbijedila funkcionalna povezanost pojedinih dijelova objekta i obezbijedio od ulaska ljudi i životinja ogradom visokom najmanje 1,80 m i udaljenom najmanje 10 m od najbliže karantinske nastambe;
3. mora imati samo jedan ulaz, preko kojega se nadzire kretanje ljudi i životinja te promet hrane za životinje i drugog materijala;
4. karantinski objekat mora imati dovoqno vode za piće i pranje, te sistem za prihvaćanje i neškodljivo odvođenje otpadnih i atmosferskih voda;
5. gnojište mora biti unutar karantinskog objekta izgrađeno tako da nije moguće zagađivanje okoline i raznošenje bioloških agenasa;
6. u karantinskom objektu ne smiju se za trajanja karantina držati druge životinje osim onih na koje se karantin odnosi;
7. ulaz u karantinski objekat mora imati dezinfekcijsku barijeru za osoblje i vozila;
8. unutar karantinskog objekta mora se obezbijediti pranje i dezinfekcija vozila nakon istovara uvezenih životinja;

9. unutar karantinskog objekta mora se obezbijediti nastamba ili prostorija za odvojeno držanje životinja kod kojih se utvrde promjene zdravstvenog stanja.

#### **Član 4.**

Nastamba u karantinskom objektu za uvezene životinje iz člana 3. ove odluke u vezi tehničkih uslova i opreme mora udovoljavati slijedećim uslovima:

1. da je izgrađena od čvrstog materijala, da obezbjeđuje tehnološke uslove uzgoja i normative higijene smještaja i dobrobiti za uvezene životinje;
2. ulaz u karantinsku nastambu mora imati dezinfekcijske barijere za osoblje i vozila;
3. karantinska nastamba mora imati podesne prostorije, ili ograđene prostore, za održavanje higijene radnika.

#### **Član 5.**

Uvezeno sjeme i zamci sisavaca moraju se čuvati u prikladnim posebno označenim spremnicima u odvojenoj prostoriji do završetka karantina.

Uvezena jaja za rasplod domaće peradi, pernate divljači i drugih ptica moraju se čuvati u odvojenoj prostoriji do valjenja.

Uvezena jaja za rasplod mogu se valiti samo u posebno obilježenim predvalionicima i valionicima u kojima se u vrijeme valjenja uvezenih jaja ne smiju valiti jaja drugog porijekla.

#### **Član 6.**

Karantinski objekat za uvezene pse, mačke, kuniće, krznaše, ukrasne ptice i perad, akvarijske ribice, gmazove i druge životinje ako se uvoze pojedinačno ili u malom broju za vlastite potrebe kao kućni ljubimci, kao i za zvjeri, divlje i egzotične životinje za zoološke vrtove, može biti samo prostorija ili prostorije koje moraju biti građene i smještene tako da udovoljavaju tehnološkim i veterinarsko-sanitarnim uslovima za uzgoj tih vrsta, da su odvojene od prostorija u kojima se drže druge životinje i da je trajno omogućen veterinarski nadzor.

Karantinski objekat za uvezene životinje iz stava 1. ovog člana, a koje se uvoze u većem broju za daljnji uzgoj ili prodaju, moraju udovoljavati uslovima iz čl. 3. i 4. ove odluke.

Karantinski objekat za uvezenu divljač namijenjen uzgoju na farmama ili za obnovu lovišta, mora udovoljavati uslovima iz čl. 3. i 4. ove odluke.

#### **Član 7.**

Karantinski objekat za uvezene pčele, dudove svilce, ribe i njihova oplodena jaja (ikre), rakove, školjke, kornjače, puževe, pijavice i laboratorijske životinje, mora biti ograđen tako da udovoljava tehnološkim i veterinarsko-zdravstvenim uslovima za uzgoj tih životinjskih vrsta i smješten tako da obezbjeđuje odvojenost od drugih životinja.

#### **Član 8.**

Karantinski objekat mora biti pripremljen za prijem životinja iz uvoza najmanje 14 dana prije njihovog prispjeća u karantin.

Priprema karantinskog objekta podrazumijeva temeljito čišćenje i dezinfekciju odgovarajućim sredstvom, otvorenih površina u krugu karantinskog objekta, površina objekta, opreme i pribora za rad.

## **Član 9.**

Za vrijeme trajanja karantina, ulaz u krug karantinskog objekta zabranjen je licima koja nisu zaposlena u karantinu, osim službenim veterinarima i ovlaštenim veterinarskim radnicima koji provode naređene mjere u karantinu.

## **Član 10.**

Karantin za uvezene životinje, za sjeme i zametke sisavaca traje do završetka naređenih dijagnostičkih pretraga, a ni u kom slučaju ne može biti kraća od 21 dana a niti duža od 30 dana.

Karantin za uvezena rasplodna jaja domaće peradi i drugih ptica traje tokom inkubiranja i tri dana nakon valenja.

## **Član 11.**

Mjesto karantina i minimalne mjere u karantinu određuje Kancelarija Rješenjem o nepostojanju veterinarsko-zdravstvenih smetnji za uvoz pošiljki životinja, a na osnovu pozitivnog mišljenja nadležnog službenog veterinara da objekat namijenjen karantinu ispunjava uslove određene ovom odlukom.

## **Član 12.**

Nadležni službeni veterinar, na osnovu Rješenja o nepostojanju veterinarsko-zdravstvenih smetnji za uvoz pošiljki životinja, donosi rješenje o otvaranju karantina u kojem je dužan odrediti veterinarsku organizaciju koja će provoditi naređene mjere u karantini i nadzire provođenje mjera.

Nadležni službeni veterinar može narediti provođenje i dodatnih mjera koje nisu navedene u Rješenju o nepostojanju veterinarsko-zdravstvenih smetnji za uvoz pošiljki životinja.

Zatvaranje karantina nadležni službeni veterinar vrši donošenjem rješenja, ako su provedene sve naređene mjere.

Laboratorijska ispitivanja uzoraka životinja iz karantina mogu se provoditi samo u laboratorijama ovlaštenim u skladu sa Odlukom o uslovima koje moraju ispunjavati ovlašteni veterinarski dijagnostički laboratoriji ("Službeni glasnik BiH", broj 24/04).

Jedan primjerak rješenja o otvaranju i zatvaranju karantina nadležni službeni veterinar je dužan dostaviti Kancelariji putem faksa ili poštom najkasnije 24 časa od donošenja.

## **Član 13.**

Karantin se može produžiti ako se odgovarajućim pretragama posumnja na zaraznu bolest ili se dokaže postojanje zarazne bolesti kod uvezenih životinj, o čemu odlučuje Kancelarija na zahtjev nadležnog službenog veterinara.

## **Član 14.**

Sve troškove nastale otvaranjem karantina i provođenjem mjera u karantinu snosi vlasnik životinja koje borave u karantinu.

## **Član 15.**

Ova odluka stupa na snagu danom donošenja, a objaviće se u "Službenom glasniku BiH", službenim glasilima entiteta i Brčko Distrikta Bosne i Hercegovine.

SM broj 248/04  
16. septembra 2004. godine  
Sarajevo  
Predsjedavajući  
Savjeta ministara BiH  
**Adnan Terzić**, s. r.